



CONVENIO DE COOPERACIÓN EDUCATIVA ENTRE A CONSELLERÍA DE CULTURA, EDUCACIÓN E ORDENACIÓN UNIVERSITARIA E A UNIVERSIDADE DE VIGO PARA A REALIZACIÓN DAS PRÁCTICAS ACADÉMICAS EXTERNAS CURRICULARES (PRACTICUM) CORRESPONDENTES AOS TÍTULOS DE GRAO IMPARTIDOS NA FACULDADE DE CIENCIAS DA EDUCACIÓN E NA FACULDADE DE FORMACIÓN DO PROFESORADO

Santiago de Compostela, 15 de xullo de dous mil quince

REUNIDOS:

Dunha parte: D. Román Rodríguez González, conselleiro de Cultura, Educación e Ordenación Universitaria que, en virtude do seu nomeamento mediante o Decreto 15/2015, do 9 de febreiro, actúa de conformidade coas facultades que lle atribúe o artigo 34 da Lei 1/1983, do 22 de febreiro, de normas reguladoras da Xunta e da súa Presidencia.

Da outra, D. Salustiano Mato de la Iglesia, reitor da Universidade de Vigo, nomeado segundo o Decreto da comunidade autónoma de Galicia 47/2014, do 24 de abril, publicado no Diario Oficial de Galicia (DOG) núm. 79 do 25 de abril de 2014, de acordo coas competencias que lle confire o artigo 20 da Lei orgánica 6/2001, do 21 de decembro, de universidades, e o artigo 58 dos Estatutos da Universidade de Vigo, aprobados polo Decreto 7/2010, do 14 de xaneiro, e publicados no DOG núm. 21, de 2 de febreiro de 2010 (BOE núm. 69, de 20 de marzo de 2010).

Interveñen en función dos seus respectivos cargos e en exercicio das facultades que para convir en nome das entidades que representan teñen conferidas.



EXPOÑEN:

I. Na nova ordenación das ensinanzas universitarias derivada da adaptación ao espazo europeo de educación superior (EEES) ponse unha especial énfase na realización por parte dos/das estudantes de grao de prácticas externas con valor académico en entidades públicas ou privadas, nacionais ou internacionais, desde a consciencia de que a combinación dunha axeitada formación teórica universitaria co coñecemento aplicado das técnicas e das metodoloxías desenvolvidas no campo profesional constitúe a base máis sólida para a súa formación integral, ao capacitalos correctamente para a súa futura inserción no mercado laboral.

En concreto, para os graos de educación infantil e de educación primaria, terase en conta a Orde ECI/3854/2007 e a Orde ECI/3857/2007, do 27 de decembro, polas que se establecen os requisitos para a verificación dos títulos universitarios oficiais que habiliten para o exercicio das profesións reguladas de mestre en educación infantil e mestre en educación primaria, respectivamente (BOE do 29 de decembro de 2007), indican no apartado 5 dos anexos correspondentes que o Practicum se desenvolverá en centros "...recoñecidos como centros de formación en prácticas mediante convenios entre as administracións educativas e as universidades. Terá carácter presencial e estará tutelado por profesores universitarios e mestres acreditados como tutores de prácticas".

II. Que a Consellería de Cultura, Educación e Ordenación Universitaria ten interese en colaborar no sistema de formación práctica do alumnado da Universidade de Vigo co obxectivo de contribuír á formación integral do alumnado universitario de xeito que se complemente a súa aprendizaxe teórica e práctica, se facilite o coñecemento da metodoloxía de traballo adecuada á realidade profesional na que se desenvolverán e se favoreza o desenvolvemento das súas competencias técnicas, metodolóxicas e persoais. Asemade a colaboración na formación práctica permitirá aliñar a formación inicial dos futuros profesionais coas competencias profesionais docentes que precisarán, e que se derivan do desenvolvemento actual e das necesidades futuras dos sistemas educativos.



III. Que a Universidade de Vigo, dedicada a actividades de docencia, investigación e desenvolvemento científico e técnico, ten a vontade de potenciar a realización de actividades formativas, especialización e prácticas en centros educativos dependentes da Consellería de Cultura, Educación e Ordenación Universitaria, coa finalidade de contribuír a unha mellor e máis completa formación e cualificación dos seus titulados.

IV. En atención ao exposto, ambas as dúas partes conveñen en formalizar este convenio de cooperación de acordo coas seguintes

CLÁUSULAS

Primeira. Obxecto

O obxecto deste convenio é regular un programa de prácticas académicas externas curriculares (Practicum) de estudos de grao entre a Consellería de Cultura, Educación e Ordenación Universitaria e a Universidade de Vigo para facilitar a preparación para o exercicio profesional dos/das estudantes en ámbitos relacionados coa súa formación universitaria e as posibles saídas profesionais desde os estudos de grao cursados nas facultades de Ciencias da Educación e de Formación do Profesorado da Universidade de Vigo. Deste xeito promoverase o futuro desenvolvemento profesional e o acceso ao mercado laboral das futuras persoas tituladas universitarias.

Segunda. Carácter

Dado o carácter formativo das prácticas académicas externas curriculares (Practicum), da súa realización non se derivarán en ningún caso obrigas propias dunha relación laboral nin ó seu contido poderá dar lugar á substitución da prestación laboral propia de postos de traballo.



Terceira. Réxime

A Universidade de Vigo axustarase á normativa vixente en cada momento para tramitar, xestionar e difundir as prácticas académicas externas (Practicum) nos estudos de grao, en particular o desenvolvemento deste convenio aterase ao establecido no Real decreto 592/2014, do 11 de xullo, polo que se regulan as prácticas académicas externas dos estudantes universitarios (BOE do 30 de xullo de 2014).

A adscrición do alumnado que vai realizar as prácticas deberá facerse de acordo cos criterios fixados polos responsables universitarios das titulacións correspondentes, nos centros educativos dependentes da Consellería de Cultura, Educación e Ordenación Universitaria da Xunta de Galicia, en relación con estas titulacións.

Para isto, os centros universitarios realizarán unha convocatoria entre o alumnado matriculado en cada título, na que se indicará o número de alumnos/as de prácticas e as condicións da práctica académica externa, garantindo os principios de transparencia, publicidade e igualdade de oportunidades.

Cuarta. Persoas beneficiarias e requisitos

1 Poden realizar as prácticas académicas externas curriculares (Practicum) obxecto dos estudos de grao deste convenio:

- 1) O alumnado matriculado nalgunha titulación de grao impartida nas facultades de Ciencias da Educación e de Formación do Profesorado, que inclúan no seu plan de estudos a materia de prácticas externas curriculares (Practicum).
- 2) Os/as estudantes doutras universidades españolas ou estranxeiras que, por razón de programas de mobilidade académica ou de convenios establecidos entre elas, estean cursando estudos de grao nos citados centros da Universidade de Vigo.

2 Para realizar as prácticas curriculares externas (Practicum) nos estudos de grao o alumnado deberá cumprir os seguintes requisitos:



- 1) Estar matriculado/a na ensinanza universitaria de grao á que se vinculan as competencias básicas, xenéricas e/ou específicas que adquirirá ao realizar a práctica.
- 2) Estar matriculado/a na materia vinculada, segundo o plan de estudos de que se trate.
- 3) Non manter ningunha relación contractual coa Xunta de Galicia, ou co centro no que se van realizar as prácticas, salvo naqueles casos en que se considere oportuno autorizalo, de xeito motivado e conforme a normativa interna da universidade, pola vicerreitoría competente na materia.

Quinta. Programa das prácticas

O programa de prácticas académicas desenvolverase conforme os seguintes termos:

1. A duración das prácticas externas será a que estableza o plan de estudos correspondente nos termos establecidos polo artigo 12.6 do Real decreto 1393/2007, do 29 de outubro, polo que se establece a ordenación das ensinanzas universitarias oficiais.
2. O alumnado contará cunha persoa titora dun centro dependente da Consellería de Cultura, Educación e Ordenación Universitaria e con outra das facultades correspondentes para realizar as prácticas.
3. O horario das prácticas procurará en todos os casos adaptarse aos horarios lectivos. En particular, o alumnado ten dereito a realizar as probas de avaliación correspondentes aos estudos nos que se matriculase e o/a director/a da institución no que se realizan as prácticas concederlle os permisos necesarios para asistir a elas.
4. O proxecto formativo no que se concreta a realización de cada práctica académica externa fixará os obxectivos educativos e as actividades que se desenvolverán.



Sexta. Dereitos e deberes

- Da persoa titora do centro colaborador

1. Dereitos

- a. Ao recoñecemento da súa actividade colaboradora por parte da Universidade de Vigo, cunha certificación acreditativa do traballo realizado, en función dos termos establecidos por esta.
- b. A ser informado da normativa que regula as prácticas externas así como do proxecto formativo e das condicións do seu desenvolvemento.
- c. Ter acceso á Universidade de Vigo para obter a información e o apoio necesarios para o cumprimento dos fins propios da súa función.

2. Deberes

- a. Acoller o/a estudante e organizar a actividade a desenvolver de acordo co establecido no proxecto formativo.
- b. Supervisar as súas actividades, orientar e controlar o desenvolvemento da práctica cunha relación baseada no respecto mutuo e o compromiso coa aprendizaxe.
- c. Informar o/a estudante da organización e funcionamento da entidade e da normativa de interese, especialmente a relativa á seguridade e riscos laborais.
- d. Coordinar coa persoa titora académica da Universidade de Vigo o desenvolvemento das actividades establecidas, incluíndo aquelas modificacións do plan de traballo que poidan ser necesarias para o normal desenvolvemento da práctica, así como a comunicación e resolución de posibles incidencias que poidesen xurdir no desenvolvemento dela e o control de permisos para a realización de exames.
- e. Emitir un informe final que lle remitirá ao titor académico da Universidade de Vigo á conclusión das prácticas, que recollerá o número de horas realizadas polo/a estudante e no cal poderá valorar aspectos referidos, de ser o caso,



tanto ás competencias xenéricas como ás específicas, previstas no correspondente proxecto formativo.

- Da persoa titora académica da Universidade de Vigo

1. Dereitos

- a. Ao recoñecemento efectivo da súa actividade académica nos termos que estableza a Universidade de Vigo, de acordo coa súa normativa interna.
- b. A ser informado da normativa que regula as prácticas externas así como das condicións baixo as que se desenvolverá a estancia do/a estudante que se tutelarán.
- c. Ter acceso ao centro educativo para o cumprimento dos fins propios da súa función, e a aquela información imprescindible para o exercicio da súa actividade.

2. Deberes

- a. Velar polo normal desenvolvemento do proxecto formativo, garantindo a compatibilidade do horario de realización das prácticas coas obrigas académicas, formativas e de representación e participación do/a estudante e de asistencias a actividades de avaliación doutras materias.
- b. Facer un seguimento efectivo das prácticas coordinándose para iso coa persoa titora da entidade colaboradora e vistos, de ser o caso, os informes de seguimento.
- c. Autorizar as modificacións que se produzan no plan de traballo.
- d. Levar a cabo o proceso avaliador das prácticas dos/as estudantes tutelados de acordo cos procedementos que establece a Universidade de Vigo, cubrindo o correspondente informe de avaliación.
- e. Gardar confidencialidade en relación con calquera información que coñeza como consecuencia da súa actividade como persoa titora.



- f. Informar o órgano responsable das prácticas externas nas facultades correspondentes das posibles incidencias xurdidas.
- g. Supervisar e, de ser o caso, solicitar a adecuada disposición dos recursos de apoio necesarios para asegurar que os estudantes con discapacidade realicen as súas prácticas en condicións de igualdade de oportunidades, non discriminación e accesibilidade universal.

- Do estudiantado en prácticas

1. Dereitos

- a. Á tutela, durante o período de duración da correspondente práctica, por un docente do centro no que cursa os estudos de grao e por un profesional que preste servizos no centro dependente da Consellería de Cultura, Educación e Ordenación Universitaria onde se realice.
- b. Á avaliación de acordo cos criterios establecidos pola Universidade de Vigo.
- c. Á obtención dun informe por parte da entidade colaboradora onde realizaron as prácticas, con mención expresa da actividade desenvolvida, a súa duración e, de ser o caso, o seu rendemento.
- d. A cumprir coa súa actividade académica, formativa e de representación e participación, previa comunicación con antelación suficiente á entidade colaboradora.
- e. A dispoñer dos recursos necesarios para o acceso dos/das estudantes con discapacidade á tutela, á información, á avaliación e ao propio desempeño das prácticas en igualdade de condicións.
- f. A conciliar, no caso dos/das estudantes con discapacidade, a realización das prácticas con aquelas actividades e situacións persoais derivadas ou conectadas coa situación de discapacidade.



- g. Aqueloutros, de ser o caso, previstos na normativa da Universidade de Vigo.

2. Deberes

- a. Cumprir a normativa vixente relativa a prácticas externas establecida pola Universidade de Vigo.
- b. Coñecer e cumprir o proxecto formativo das prácticas seguindo as indicacións do titor/a asignado/a pola entidade colaboradora baixo a supervisión do titor/a académico/a da Universidade de Vigo.
- c. Manter contacto co/a titor/a académico/a da Universidade de Vigo durante o desenvolvemento da práctica e comunicarlle calquera incidencia que poida xurdir nela, así como facer entrega dos documentos e a memoria final que lle sexan requiridos.
- d. Incorporarse á entidade colaboradora de que se trate na data acordada, cumprir o horario previsto no proxecto educativo e respectar as normas de funcionamento, seguridade e prevención de riscos laborais dela.
- e. Desenvolver o proxecto formativo e cumprir con dilixencia as actividades acordadas coa entidade colaboradora conforme ás liñas establecidas nel.
- f. Elaboración da memoria final das prácticas na que deberá figurar, entre outros, os seguintes aspectos: datos persoais do/a estudante; entidade colaboradora onde realizou as prácticas e lugar; descrición concreta e detallada das tarefas; traballos desenvolvidos e departamentos da entidade aos que estivo asignado; valoración das tarefas desenvolvidas cos coñecementos e competencias adquiridos en relación cos estudos universitarios; relación dos problemas suscitados e o procedemento seguido para a súa resolución; identificación das achegas que, en materia de aprendizaxe, supuxeron as prácticas; avaliación das prácticas e suxestións de mellora.



- g. Gardar confidencialidade en relación coa información interna da entidade colaboradora e gardar segredo profesional sobre as súas actividades, durante a súa estancia e finalizada esta.
- h. Mostrar, en todo momento, unha actitude respectuosa cara á política da entidade colaboradora, salvaguardando o bo nome da universidade á que pertence.

Sétima. Certificacións e recoñecementos

Ao finalizar as prácticas, a Universidade de Vigo entregaralle a cada estudante que o solicite un certificado que conterá como mínimo os seguintes aspectos:

1. Titular do documento.
2. Entidade colaboradora onde se realizaron as prácticas.
3. Descrición da práctica especificando a súa duración e datas de realización.
4. Actividades realizadas.

A persoa titora da entidade colaboradora recibirá unha certificación da Universidade de Vigo de recoñecemento polo labor realizado.

Coa finalidade de manter en todo momento o rexistro de estudantes participantes baixo este convenio, aqueles centros ou servizos nos que se realicen as prácticas comunicaranlle á facultade á que estean adscritos os/as alumnos/as calquera alta ou baixa que se produza. Xunto á alta de cada estudante, comunicarán tamén a data do comezo e finalización das prácticas, o período de vacacións, se o houberse, o lugar do desenvolvemento e o seu contido.

Oitava. Seguro para o alumnado de prácticas

Segundo o Real decreto 1493/2011, do 24 de outubro, polo que se regulan os termos e as condicións de inclusión no réxime xeral da Seguridade Social das persoas que participen en programas de formación, en desenvolvemento do previsto na disposición



adicional terceira da Lei 27/2011, do 1 de agosto, sobre actualización, adecuación e modernización da Seguridade Social, as prácticas en empresas que realicen os/as estudantes estarán cubertas polo seguro escolar, sempre que o alumnado estea matriculado e ao corrente do pagamento do citado seguro.

A Universidade de Vigo ten subscrito, a maiores, un seguro de responsabilidade civil e outro de accidentes, complementarios ao seguro escolar.

A inclusión no réxime xeral da Seguridade Social dos/as estudantes que realicen prácticas académicas externas rexeráse polo establecido no R.D. 1493/2011, do 24 de outubro, e polo desenvolvemento normativo establecido pola Tesourería Xeral da Seguridade Social.

Novena. Responsabilidade das actuacións

A subscrición deste convenio non implica relación contractual laboral, ou de calquera outro tipo, entre o alumnado que vaia desenvolver as actividades contidas no programa de formación práctica e a Consellería de Cultura, Educación e Ordenación Universitaria, de tal xeito que non se lle poderá esixir responsabilidade ningunha, nin directa nin subsidiariamente, polos actos ou feitos acaecidos no desenvolvemento das prácticas.

Décima. Comisión de seguimento

1. Para o seguimento da execución deste convenio e a realización das propostas de modificación e desenvolvemento do mesmo que se consideren oportunas constituirase unha comisión paritaria de representantes da Consellería de Cultura, Educación e Ordenación Universitaria da Xunta de Galicia e da Universidade de Vigo, coa seguinte composición:

- Pola Consellería de Cultura, Educación e Ordenación Universitaria: tres persoas nomeadas polo conselleiro.
- Pola Universidade de Vigo: tres persoas nomeadas polo reitor.

2. A comisión de seguimento asumirá o compromiso de levar a bo fin os obxectivos que xustifican a sinatura deste convenio. Serán as súas funcións:



- Con carácter xeral, interpretación e aplicación das estipulacións deste convenio, así como velar polo seu cumprimento.
- Propoñer para a súa aprobación polos órganos competentes, addendas ou modificacións deste convenio.

Décimo primeira. Valoración económica

A realización deste convenio non supón ningún gasto para as institucións asinantes; por este motivo non se precisa consignación orzamentaria.

Décimo segunda. Protección de datos de carácter persoal

De conformidade co disposto na Lei orgánica 15/1999 de 13 de decembro, de datos de carácter persoal, e no Real decreto 1720/2007, polo que se aproba o Regulamento de desenvolvemento da mencionada lei orgánica, o/a estudante en prácticas que por razón das actividades formativas teña acceso en calquera fase do tratamento a datos de carácter persoal, non lle revelará á persoa allea á institución información da que tivese coñecemento, nin utilizará ou disporá dela dun xeito ou con finalidade distinta á esixida polas accións formativas, obriga que subsistirá aínda despois de rematadas estas, respondendo en caso de incumprimento do deber de segredo fronte a institución, sen prexuízo das responsabilidades que por igual causa puideran derivarse ante a Axencia Española de Protección de Datos.

Para tal efecto poderáselle requirir o/a estudante a sinatura coa institución dun documento no que se obrigue a cumprir o citado deber de segredo.

Décimo terceira. Rexistro de convenios

A sinatura deste convenio suporá o consentimento expreso da Universidade de Vigo para incluír e facer públicos os datos referidos ao convenio, de conformidade co artigo 11 da Lei 4/2006, do 30 de xuño, de transparencia e boas prácticas na Administración pública



galega, e co Decreto 126/2006, do 20 de xullo, polo que se regula o rexistro de convenios da Xunta de Galicia.

Décimo cuarta. Causas de resolución

Este convenio resolverase polas seguintes causas:

- a. Por incumprimento total ou parcial dalgún dos seus puntos.
- b. Polo transcurso do tempo estipulado sen que se culminen as actuacións acordadas.

Décimo quinta. Normativa aplicable e xurisdición

Este convenio ten carácter administrativo e os seus efectos rexeranse polo establecido nas súas cláusulas, e quedará suxeito ao disposto polo Acordo da Xunta de Galicia, do 27 de marzo de 1991, sobre convenios de cooperación con outros entes públicos e de colaboración con particulares, feito público pola Resolución da Consellería e Facenda do 8 de abril de 1991.

Seralle, así mesmo, de aplicación o Real decreto 592/2014, do 11 de xullo, polo que se regulan as prácticas académicas externas dos estudantes universitarios.



As cuestións litixiosas que xurdisen respecto da interpretación, a modificación, a resolución serán resoltas de mutuo acordo polas partes. En defecto de acordo entre as partes, a xurisdición contencioso-administrativa será a competente para dirimir as cuestións que puidesen xurdir da aplicación deste convenio.

Décimo sexta. Vixencia

O presente convenio entrará en vigor o día seguinte ao da súa sinatura e terá duración ata o remate do curso académico correspondente, e será prorrogado automaticamente por cursos académicos sucesivos, salvo denuncia expresa dunha das partes asinantes cunha notificación á outra con dous meses de antelación.



En proba de conformidade, ambas as dúas partes asinan este convenio por triplicado na data e lugar indicados no encabezamento.

<p>O conselleiro de Cultura, Educación e Ordenación Universitaria</p>  <p>Román Rodríguez González</p>	<p>O Reitor da Universidade de Vigo</p>  <p>Salustiano Mato de la Iglesia</p>
---	---